

29 janvier 1635

DECLARATION

DV ROY, POVR LE
Reglement General des Passe-
mens & Dentelles. Avec defen-
ses d'en porter, vendre & trafi-
quer de celles des Pais estran-
gers: Ensemble de tenir aucunes
Academies ou Brelands pour le
Ieu de hazard.

Verifiée en Parlement le 12. Mars 1635.



A P A R I S,

Par A. ESTIENE, P. METTAYER & C. PRE-
VOST, Imprimeurs ordinaires du Roy.

M. DC. XXXV.

Avec Privilege de sa Maiefté.

Case

F

39

.326

1635 fa



L OVIS par la grace de
Dieu Roy de France &
deNauarre, A tous ceux
qui ces presentes Let-
tres verront, Salut. C O M B I E N que
par nostre Declaration du mois de
Nouembre de l'année mil six cens
trente-trois, nous ayons assez tes-
moigné quelle estoit nostre volon-
té touchant l'vsage des passemens &
dentelles qui se font tant dedans
que dehors nostre Royaume, & que
par nostre exemple nous ayons fait
voir que nous tenions l'execution
d'icelle importante au bien de cét
Estat, Neantmoins plusieurs de nos
Subjets ingenieux à leur ruine, se-
condéz en cela par les Marchands,

A ij

qui n'ont pour but que leur interest particulier , ont par toutes sortes d'artifices pratiqué les moyens pour eluder ce qui estoit de nostre intention en ce regard: Car sans crainte d'encourir les peines portées par nos Ordonnances , ils ont tiré des Pais estrangers des passemens & dentelles tant de fil que de soye , & fait fabriquer en nostre Royaume de ces passemens & dentelles à plus haut prix qu'il n'est porté par nostre dite Declaration. Ce qui a esté fauorisé & receu par vne infinité de personnes fonduës dans le luxe , & par d'autres qui se ruinent à leur exemple, A quoy il est necessaire de pouruoir. Comme aussi aux plaintes qui nous ont esté faites depuis vn long temps, d'vn grand nombre de brelans & reduits qui se font en plusieurs maisons des meilleures

Villes de nostre Royaume, où l'on iouë à toutes sortes de ieux de hazard, & où se commettent en suite infinies mauuaises actions, blasphemés execrables, & toutes les desbauches que le luxe & la profusion produisent d'ordinaire, outre la ruine & desolation de beaucoup de familles. Comme l'vn. & l'autre de ces maux ont pris leur accroissement par la licence & par la conniuece des Magistrats & Officiers, ausquels l'exécution de nos Edicts & Ordonnances est commise, nous estimons ne deuoir plus differer d'y apporter les remedes qui sont en nostre puissance.

A CES CAUSES, Auons de l'Aduis de nostre Conseil, & de nostre certaine science, pleine puissance & autorité Royale, fait & faisons tres-expresses inhibitions &

defenses à tous nos Subjets, de quelque qualité & condition qu'ils soient, de porter des dentelles tant de fil que de soye, faites & fabriquées en Pais estrange, sur peine à l'encontre des contreuenans, de confiscation desdites marchandises, & de six mil liures d'amende, applicable le tiers aux denonciateurs, les deux autres tiers au principal Hospital de la Ville où les Iugemens & Sentences seront renduës,

II.

Et pour le regard des Marchands, qui sont la principale cause de ce desordre, nous leur faisons pareillement defenses, & à tous autres de nos Subjets quels qu'ils soient, de trafiquer tant dedans que dehors nostre Royaume, desdits ouurages & marchandises de fil & de soye cy-dessus defenduës, ny les exposer en

vente à nosdits Sujets, à peine contre chacun des contreuenâs, de confiscation de tous lesdits ouvrages & marchandises, & de dix mil liures d'amende, le tiers applicable aux denonciateurs, & les deux autres tiers à l'Hospital principal des lieux où ils seront demeurans, & en outre d'estre declarez incapables de pouuoir exercer aucun trafic ny commerce en nostre Royaume.

III.

Et pour le regard des dentelles de fil & de soye fabriquées dans nostredit Royaume, nous en permettons l'usage, en sorte que nous n'entendons pas qu'ils soient plus hautes que d'un poulce de Roy, faisons tres-expresses défenses, sur les peines spécifiées cy-dessus, d'en porter d'autre sorte.

IV.

Auons pareillement fait des defenses

aux Marchands, de quelque qualité & condition qu'ils soient, & sur les mesmes peines, comme aussi à ceux qui trauaillent aux ouurages desdites dentelles, d'en vendre, trafiquer & fabriquer d'autre sorte que de ladite hauteur d'un poulce de Roy, sur les mesmes peines, & de bannissement contre les ouuriers.

V.

POVR ce qui concerne les brelans & reduits, comme c'est vn des plus grands desordres qui puisse estre dans vn Estat, il requiert aussi vne plus seuerre reformation, nous faisons tres-expresses inhibitions & defenses à toutes personnes, de quelque condition & qualité qu'elles soient, de se trouuer ausdits lieux appelez brelans, reduits ou academies, où l'on iouë toutes sortes de jeux de hazard, sur peine de dix mil liures

9
liures d'amende.

VI.

Et pour le regard de ceux qui occupent lescdites maisons, soit propriétaires ou locataires où se tiennent lescdits reduits, nous leur faisons pareilles defences de s'en servir à l'aduenir à cét vsage, sur mesmes peines, & d'estre declarez infames & indignes de tenir Offices & Benefices en nostre Royaume.

VII.

Enioignons aux Commissaires du Chastelet de Paris, de faire chacun en leurs quartiers, de quinzaine en quinzaine, recherche exacte des lieux où se font lescdits reduits & brelans, & faire apparoir de leurs diligences à nostre Procureur General.

VIII.

Et au cas qu'il se trouue, vn mois

B

apres la publication du present
 Edict, vn lieu où soit vn brelan ou
 reduit, dont on n'aura esté aduerty,
 nous voulons que le Commissaire
 au quartier duquel se trouuera sci-
 tuée ladite maison, soit interdit de
 sa charge pour six mois, & condem-
 né en deux cens liures d'amende, la
 moitié applicable au denonciateur,
 soit Commissaire dudit Chastelet,
 ou autre quel qu'il soit, & l'autre
 moitié à l'Hostel-Dieu de la Ville
 de Paris.

I X.

Voulons aussi & nous plaist, que
 les propriétaires des maisons où se-
 ront lesdits brelans, aussi-tost qu'ils
 seront aduertis par les Commissai-
 res des quartiers, de la condition de
 ceux à qui ils auront baillé à loyer
 leurs maisons, qu'ils les en facét for-
 tir incontinent, à peine de perdre les

loyers de leurfdites maisôs , lesquels
seront portez audit Hostel-Dieu.

X.

Entendons aussi qu'aux Villes de
nostre Royaume où cette corru-
ption s'est glissée, la recherche s'en
face aussi tres-exactement, & à la di-
ligence de ceux qui ont esgard à la
Police desdites Villes, & d'en faire
leurs rapports à nos Procureurs ge-
neraux, & aux Iuges ordinaires des
lieux, pour y apporter l'ordre sui-
uant nostre volonté.

XI.

Voulons & entendons que les
Sentences & iugemens des confisca-
tions & amendes qui seront rendues
à l'encontre des contreuenans, soiēt
executées nonobstant oppositions
& appellations quelconques.

SI DONNONS EN MANDE-
MENT à nos amez & feaux Con-

seillers, les Gens tenans nos Cours de Parlements, Baillifs, Seneschaux, Iuges ou leurs Lieutenans, & à tous nos autres Iusticiers & Officiers qu'il appartiendra, que ces presentes ils facent lire, publier, registrer, executer, garder & obseruer selon leur forme & teneur. Enioignons à nos Procureurs Generaux, leurs Substituts presens & à venir, y tenir la main, & faire toutes les diligences requises & necessaires pour ladite execution, sur peine de nous respondre des contrauentions en leurs propres & priuez noms: Car tel est nostre plaisir. DONNE' à Paris le vingt-neufiesme iour de Ianuier, l'an de grace mil six cens trente-cinq, & de nostre regne le vingt-cinquieme. Signé, LOVIS: & sur le reply; Par le Roy, DE LOMENIE, & scellée sur double queue du grand

Seau de cire iaunc. Et sur ledit reply
est encor écrit:

*Lettres, publiées, registrées, oüy & ce
requerant le Procureur General du Roy,
pour estre executées, gardées & obseruées se-
lon leur forme & teneur, pour auoir lieu hui-
taine apres la publication des presentes, &
à la charge que les passements & dentelles
portées par lesdites Lettres, n'excederont le
prix de neuf liures tournois l'aune au plus;
& qu'il sera informé des contrauentions fai-
tes par les Marchands, tant du passé que
de l'aduenir, par les Iuges des lieux, ausquels
elle enjoint de ce faire; Et que copies colla-
tionnées aux Originaux d'icelles, seront en-
uoyées aux Bailliages & Seneschaussées
de ce ressort, pour y estre pareillement leuës,
publiées, registrées, gardées & obseruées à la
diligence des Substituts dudit Procureur Ge-
neral, ausquels enjoint d'y tenir la main, &
en certifier la Cour auoir ce fait au mois.*

**A Paris en Parlement, le douzième iour de
Mars mil six cens trente-cinq.**

Signé, DV TILLET.



